

曰小臣及覆思之自知審矣身為諫長尤不可翫然行之請從臣之誠懇答曰卿清德非一人所薦乃朝廷所共舉勿辭○夜巽方南方坤方如火氣

丁酉 上御朝講同知經筵事沈連源曰正容齋頽此乃正心功夫所當深省也侍讀官李首慶曰此所引曲禮毋側聽以下等語與昨日所講視聽言動意同蓋情慢人之常情終日行禮固當厭倦然行之不已以至於熟則可以固我肌膚之會筋骸之束而終至於安矣夫禮實安身之要也司諫金魯曰宋臣司馬光曰受人恩而不忍背者為子必孝為臣必忠雖在萬世之下觀此言者孰不感激今 殿下於 仁宗有君道焉有父道焉不啻兄弟間而已前者當 殿下疫瘳之日 仁宗有喜色焉即命柳之蕃為堂上是不以人臣之道待 殿下也臣意竊料他日將欲付之以大事也 仁宗於 殿下有莫大之恩殿下之所以報 仁宗者當盡其誠孝也頃者尹元老與李建陽乃敢推卜 聖壽猶恐不凶是大逆也書諸史冊傳之萬世